

LIGJI NR. 06/L-058**PËR NDRYSHIMIN DHE PLOTËSIMIN E LIGJIT NR. 04/L-036 PËR STATISTIKAT ZYRTARE TË REPUBLIKËS E KOSOVËS****Kuvendi i Republikës së Kosovës,**

Në mbështetje të nenit 65 (1) të Kushtetutës së Republikës së Kosovës,

Miraton:

LIGJ PËR NDRYSHIMIN DHE PLOTËSIMIN E LIGJIT NR. 04/L-036 PËR STATISTIKAT ZYRTARE TË REPUBLIKËS E KOSOVËS**Neni 1
Qëllimi**

1. Qëllimi i këtij Ligji është ndryshimi dhe plotësimi i Ligjit Nr.04/L-036 për Statistikat Zyrtare të Republikës së Kosovës.
2. Ky Ligj është në përputhshmëri me Rregulloren Nr. 223/2009 të Parlamentit Evropian, Këshillit mbi Statistikat Evropiane të 11 Marsit 2009 dhe me Kodin e Praktikës së Statistikave Evropiane.

**Neni 2
Përkufizimet**

1. Në nën-paragrafin 1.1., të nenit 2 të ligjit bazik, teksti ndryshohet si në vijim:
 - 1.1. **Statistikat** - nënkuptojnë informatat reprezentative të agreguara kualitative dhe kuantitative të fenomeneve kolektive që karakterizojnë një popullim të caktuar.
2. Pas nën-paragrafit 1.16., të nenit 2 të ligjit bazik, shtohen nën-paragrafët si në vijim:
 - 1.17. **Metadata**- do të thotë një grup të dhënash, që përshkruajnë dhe japin informacion, lidhur me të dhënat e tjera;
 - 1.18. **Të dhënat konfidenciale** - do të thotë të dhëna, që lejojnë identifikimin e njësive statistikore, ose drejtpërdrejt ose tërthorazi, duke zbuluar të dhëna individuale. Për të përcaktuar nëse një njësi statistikore është e identifikueshme, duhet të merren parasysh të gjitha mjetet relevante, që mund të përdoren në mënyrë të arsyeshme nga një palë e tretë për identifikimin e njësisë statistikore;
 - 1.19. **Përdorimi për qëllime statistikore** - nënkupton përdorimin e veçantë për zhvillimin dhe prodhimin e rezultateve statistikore dhe analizave.

Neni 3

1. Paragrafi 1. i neni 3 i ligjit bazik ndryshohet si në vijim:
 1. Për ta siguruar cilësinë e statistikave zyrtare, për ta ruajtur besimin e opinionit të gjerë, organizimin, zbatimin e Programit dhe harmonizimin e Statistikave Zyrtare me Kodin e Praktikës së Statistikave Evropiane, Statistikat Zyrtare sipas këtij Ligji udhëhiqen nga parimet e mëposhtme.
2. Në nën-paragrafët 1.4. dhe 1.5. të nenit 3 në ligjin bazik, teksti ndryshohet si në vijim:

1.4. **Besueshmëria** - do të thotë se statistika duhet të matet me besnikëri, me saktësi dhe në mënyrë të vazhdueshme të jetë i mundur realiteti, që është dizajnuar për t'u përfaqësuar, si dhe duke lënë të kuptohet se janë përdorur kriteret shkencore për përzgjedhjen e burimeve, të metodave dhe të procedurave;

1.5. **Efektiviteti i kostos** - do të thotë se kostot e prodhimit të statistikave duhet të jenë në proporcion me rëndësinë e rezultateve dhe përfitimet e kërkuara, që burimet duhet të shfrytëzohen në mënyrë optimale dhe barra e përgjigjes të jetë minimizuar. Informacioni i kërkuar, kur është e mundur, të jetë i gatshëm të nxirret nga të dhënat në dispozicion ose nga burimet.

3. Pas nën-paragrafit 1.10. të nenit 3 të ligjit bazik, shtohen nën-paragrafët si në vijim:

1.11. **Mandati për mbledhjen e të dhënave:** Bartësit e Statistikave Zyrtare kanë mandat ligjor për mbledhjen e informatave për qëllime të Statistikave Zyrtare. Njësitë administrative, ndërmarrjet dhe ekonomitë familjare, si dhe publiku i gjerë, obligohen që t'u lejojnë qasje ose të japin të dhëna për qëllime statistikore, sipas kërkesës së autoriteteve të Statistikave Zyrtare;

1.12. **Mjaftueshmëria e burimeve:** Bartësit e statistikave zyrtare duhet të kenë në dispozicion burime të mjaftueshme për t'i plotësuar kërkesat për statistika zyrtare;

1.13. **Angazhimi për cilësinë:** Bartësit e statistikave zyrtare zotohen të punojnë dhe të bashkëpunojnë sipas parimeve të Deklaratës së cilësisë së Sistemit Statistikor të Kosovës dhe Sistemit Statistikor Evropian;

1.14. **Metodologjia:** Metodologjia bazë, siguron domosdoshmërisht cilësinë e statistikave zyrtare. Kjo kërkon mjete, procedura dhe ekspertizë adekuate;

1.15. **Procedurat e përshtatshme statistikore:** Procedurat e përshtatshme statistikore, të zbatuara nga mbledhja deri te vërtetësia e të dhënave, mbështet cilësinë e të dhënave;

1.16. **Zvogëlimi i ngarkesës së respondentëve:** Ngarkesa në raportim duhet të jetë proporcionale me nevojat e shfrytëzuesve dhe jo e tepruar për respondentë. Bartësit e statistikave zyrtare e monitorojnë ngarkesën dhe i vendosin qëllimet për shkurtimin e saj gjatë gjithë kohës;

1.17. **Afatet kohore dhe përpikëria:** Statistikat zyrtare publikohen në kohën e duhur dhe në mënyrë të përpiktë;

1.18. **Koherenca dhe krahasueshmëria:** Statistikat zyrtare janë të qëndrueshme në kohë dhe të krahasueshme në nivel rajonal, vendi dhe më gjerë;

1.19. **Qasja dhe qartësia:** Statistikat zyrtare paraqiten në formë të qartë dhe të kuptueshme, të publikuara në mënyrë të përshtatshme dhe të favorshme, të disponueshme dhe të qasshme, në mënyrë të paanshme, të mbështetura me metadata dhe udhëzime.

Neni 4

1. Neni 5 të ligjit bazik i shtohet paragrafi i ri, si në vijim.

2. Agjencia e Statistikave të Kosovës, Banka Qendrore e Republikës së Kosovës dhe Ministria kompetente për financa, i shpallin rezultatet në publikimet e veta.

2. Nën-paragrafi 1.4. i paragrafit 1. të nenit 5 të ligjit bazik fjalët “të caktuara me Program” zëvendësohen me fjalët “sipas kritereve të statistikave zyrtare”.

Neni 5

1. Në paragrafin 1. të nenit 6 të ligjit bazik, teksti ndryshohet si në vijim:

1. ASK-ja është institucion profesional, i pavarur, bartës dhe shpërndarës i statistikave zyrtare dhe koordinator i statistikave zyrtare të Kosovës, e cila vepron në Zyrën e Kryeministrit apo në organin përkatës që vendos Qeveria.

2. Neni 6 të ligjit bazik, pas paragrafit 8. i shtohet paragrafi i ri si në vijim:

9. Qeveria së bashku me ASK-në nënshkruajnë marrëveshje mirëbesimi, me të cilën dakordohen për zbatimin e Kodit të Praktikës Evropiane për Statistikat Zyrtare.

Neni 6

1. Nën-paragrafi 2.8, i nenit 7 të ligjit bazik, teksti ndryshohet si në vijim:

2.8. t'i paraqes për miratim Qeverisë dhe Kuvendit raportin mbi zbatimin e planit, programit dhe shfrytëzimin e mjeteve buxhetore. Raporti vjetor i miratuar publikohet;

2. Në nenin 7 të ligjit bazik, shtohet nën-paragrafi i ri, si në vijim:

2.12. ASK-ja është koordinator nacional i sistemit statistikor të Kosovës.

3. Në nenin 7 të ligjit bazik, paragrafi 3., shtohen dy nën paragraf të ri, si në vijim:

3.5. të krijojë borde profesionale këshillëdhënëse për fushat përkatëse statistikore;

3.6. ASK-ja ka të drejtë të nënshkruajë marrëveshje mirëkuptimi me institucionet vendore dhe ndërkombëtare, sipas legjislacionin përkatës në fuqi.

Neni 7

1. Paragrafi 1. i nenit 8 të ligjit bazik riformulohet si në vijim:

1. Kryeshefi ekzekutiv i ASK-së emërohet sipas legjislacionit në fuqi, për emërimin e pozitave të larta drejtuese.

2. Paragrafi 2. i nenit 8 të ligjit bazik ndryshohet si në vijim:

2. Kryeshefi ekzekutiv i ASK-së për punën e vet i përgjigjet drejtpërdrejt titullarit të organit përkatës që vendos Qeveria.

3. Nën-paragrafi 3.7. i nenit 8 të ligjit bazik ndryshohet si në vijim:

3.7. zbatimin e detyrave të tjera, që përcaktohen me program, me plan dhe me vendim të Qeverisë.

Neni 8

Nën-paragrafi 2.10. i nenit 10 të ligjit bazik riformulohet si në vijim:

2.10. Këshilli paraqet raportin vjetor për punën e tij Kryeministrit.

Neni 9

Paragrafi 3. i nenit 12 i ligjit bazik fshihet në tërësi.

Neni 10

Neni 17 i ligjit bazik riformulohet si në vijim:

Raportin mbi zbatimin e planit vjetor e harton ASK-ja në pajtim me dispozitat e këtij Ligji.

Neni 11

Në Paragrafin 1. të nenit 19 të ligjit bazik, shprehja “ka të drejtë” të fshihet.

Neni 12

Në nenin 23 të ligjit bazik pas paragrafit 2. shtohet paragrafi i ri si në vijim:

3. ASK-ja duhet të konsultohet dhe të përfshihet në përpilimin fillestar, zhvillimin e mëvonshëm dhe ndërprerjen e të dhënave administrative të ndërtuara dhe të mbajtura nga organet e tjera, duke lehtësuar kështu përdorimin e mëtejshëm të këtyre të dhënave me qëllim të nxjerrjes së statistikave zyrtare.

Neni 13

1. Paragrafi 4. i nenit 26 të ligjit bazik ndryshohet si në vijim:

4. Qeveria me propozimin e ASK-së nxjerr udhëzim administrativ me të cilin rregullon mënyrën e ruajtjes, kohën, teknikën dhe organizimin e ruajtjes së lëndës statistikore bazuar në ligjin në fuqi mbi materialin arkivor dhe arkivat.

Neni 14

Paragrafi 5. i nenit 29 të ligjit bazik ndryshohet si në vijim:

5. Qeveria me propozimin e ASK-së, nxjerr udhëzim administrativ që përcakton rregullat mbi standardet e klasifikimit për aktivitete ekonomike dhe prodhime, për njësitë statistikore për vrojtje dhe analiza të sistemit të prodhimit dhe për krijimin e regjistrave biznesor për qëllime statistikore.

Neni 15

Pas nenit 34 të ligjit bazik shtohet neni i ri si në vijim:

Neni 34A

Shitja e të dhënave statistikore

1. ASK ka të drejtë të shes të dhëna statistikore sipas praktikave evropiane.
2. Për realizimin e paragrafit 1. të nenit 34A nxirret udhëzim administrativ i cili propozohet nga ASK-ja dhe miratohet nga Qeveria.

Neni 16

Paragrafi 3. i nenit 41 të ligjit bazik ndryshohet si në vijim:

3. Mënyrën e mbrojtjes së të dhënave statistikore në paragrafin 1. të këtij neni e propozon Kryeshefi ekzekutiv i ASK-së dhe ajo përcaktohet me udhëzim administrativ të propozuar nga ASK dhe të miratuar nga Qeveria.

Neni 17

Në paragrafin 2. të nenit 44 të ligjit bazik, fshihet fraza “pas miratimit nga ASK-ja” dhe vazhdohet me frazën “vetëm për fushat, që janë veçanërisht përgjegjësi e tyre”.

Neni 18

1. Paragrafi 3. i nenit 48 të ligjit bazik ndryshohet si në vijim:

3. Qeveria nxjerr vendim për themelimin e Këshillit, pas propozimit të anëtarëve të Këshillit nga institucionet në pajtim me nenin 9 paragrafi 1., nën-paragrafët 1.1. deri 1.10. të këtij ligji.

2. Neni 48 të ligjit bazik i shtohet paragrafi i ri, si në vijim:

4. Anëtarët e rinj të Këshillit duhet të emërohen në afatin prej një (1) muajsh nga hyrja në fuqi e këtij Ligji.

Neni 19

Neni 49 i Ligjit bazik ndryshohet si në vijim:

Qeveria në afatin prej tre (3) muajsh nga hyrja në fuqi e këtij ligji, nxjerr aktet nënligjore për zbatimin e këtij ligji.

Neni 20

Hyrja në fuqi

Ky ligji hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

Ligji Nr. 06/L-058
21 dhjetor 2018

Shpallur me dekretin Nr. DL-04-2019, datë 08.01.2019 nga Presidenti i Republikës së Kosovës Hashim Thaçi